

## CONVENIO DE COLABORACIÓN ENTRE A AXENCIA GALEGA DE INFRAESTRUTURAS E O CONCELLO DA POBRA DO CARAMIÑAL PARA A MELLORA DO VIAL SITUADO NA MARXE ESQUERDA DA AG-11 , P.Q. 32+816, NO LUGAR DE SENDE.

### REUNIDOS

Dunha parte, María Martínez Allegue, presidenta da Axencia Galega de Infraestruturas, facultada para a formalización deste convenio polo Decreto 173/2011, do 4 de agosto, polo que se aproba o estatuto da Axencia Galega de Infraestruturas.

Doutra parte, José Carlos Vidal Suárez, na súa condición de alcalde do Concello da Pobra do Caramiñal actuando en virtude das facultades representativas que lle atribúe o artigo 21.1 b) da Lei 7/1985, do 2 de abril, reguladora das bases do réxime local.

Ambas as dúas partes recoñécense mutuamente na calidade en que interveñen con capacidade legal, suficiente e necesaria, para o outorgamento do presente convenio de colaboración e, a tal efecto

### EXPOÑEN

**Primeiro.** Durante a construción da antiga VG-1,1, a rede de camiños de titularidade municipal existente ao largo do seu trazado viuse afectada, executándose variantes dos camiños afectados co obxecto de garantir a súa continuidade. Un dos camiños afectados foi o situado na actualidade no p.q. 32+816, marxe esquerda, no lugar de Sende.

**Segundo.** A existencia dese camiño xa se atopa documentada nos documentos correspondentes ao Voo Americano 1956-57, de xeito previo á construción da VG-1,1.

**Terceiro.** O camiño referido localízase á altura do p.q. 32+816 da autovía AG-11, na marxe esquerda, no lugar de Sende. O camiño ten unha obra de drenaxe transversal (en adiante ODT) composta por dous tubos de 400 mm de diámetro aproximadamente. Esta ODT do camiño recibe as augas dende unha ODT da autovía AG-11 situada augas arriba, composta por dous tubos de 1200 mm de diámetro. Os danos no camiño están na zona da saída das augas da súa ODT, na súa marxe máis afastada da autovía AG-11. Durante as obras de construción da AG-11 non se actuou nese camiño nin tampouco na súa obra de drenaxe transversal, xa que o desdoblamento foi realizado cara a outra marxe.

**Cuarto.** No ano 2025 constátase a necesidade de reparar o camiño e o sistema de drenaxe baixo el, xa que a presenza de danos no camiño na zona de saída de augas da súa ODT indican un mal funcionamento da súa drenaxe nese punto. As obras



propostas pretenden solucionar o problema de acumulación de auga que se produce en época de chuvias e frear o deterioro existente baixo o camiño, así como dotar ao firme dunhas características uniformes axeitadas ás características do tráfico que soportan.

**Quinto.** A Axencia Galega de Infraestruturas, en colaboración co Concello da Pobra do Caramiñal, trata de fomentar aqueles investimentos que resolvan problemas nas infraestruturas, coa finalidade dun desenvolvemento económico e social que aporte unha maior calidade de vida á cidadanía.

Os convenios entre administracións públicas constitúen o elemento adecuado para desenvolver a súa cooperación en cuestións de interese común, tal e como establecen o artigo 57 da Lei 7/1985, do 2 de abril, reguladora das bases de réxime local e o artigo 198 da Lei 5/1997, do 22 de xullo, de administración local de Galicia.

Considerando a confluencia dos intereses das partes comparecentes, faise preciso artellar as bases para a óptima coordinación e así regular a colaboración nas súas actuacións. Para o fin mencionado, formalízase o presente convenio con suxeición ás seguintes

## CLÁUSULAS

### PRIMEIRA. OBXECTO

O obxecto do presente convenio é establecer as bases da colaboración técnica e económica entre a Axencia Galega de Infraestruturas e o Concello da Pobra do Caramiñal para proceder ao arranxo do vial no p.q. 32+816 da autovía AG-11, na marxe esquerda, no lugar de Sende, así como a execución dunha nova rede de drenaxe para a correcta evacuación das augas.

O obxecto da actuación é o seguinte:

- Execución dunha nova rede de drenaxe para a recollida das augas.
- Reparación/regularización do firme na zona deteriorada.

O orzamento necesario para a execución destas obras estímase en corenta e sete mil novecentos corenta e nove euros con sesenta céntimos **(47.949,60 €)**. Este orzamento inclúe o orzamento base de licitación e máis o IVE.

### SEGUNDA. COMPROMISOS DO CONCELLO

O Concello da Pobra do Caramiñal obrígase a:

- 1.- Poñer a disposición os terreos necesarios, libres de cargas e gravames e co réxime urbanístico axeitado para poder realizar as obras descritas na cláusula primeira.



2.- Asumir a realización das xestións pertinentes ante os organismos que correspondan, para a obtención dos permisos, licenzas e autorizacións regulamentarias, correndo cos custos que se xeren entre os que non haberá liquidación algunha de tributo municipal a que puidera dar lugar a execución das obras ao ser o concello o seu titular.

3.- Como trámite previo á adxudicación das obras, o concello achegará a certificación xustificativa da efectiva dispoñibilidade da totalidade dos terreos.

4.- Asumir, unha vez finalizadas as obras e logo da comunicación da Axencia Galega de Infraestruturas, a súa explotación, mantemento e conservación así como as responsabilidades propias como titular destas, e o compromiso de formalizar a correspondente acta de entrega.

### **TERCEIRA. COMPROMISOS DA AXENCIA GALEGA DE INFRAESTRUTURAS (AXI)**

1. Redactar o documento técnico que define as obras previstas no presente convenio.

2. Financiar os gastos de execución das obras, destinando para iso un máximo de corenta e sete mil novecentos corenta e nove euros con sesenta céntimos **(47.949,60 €)** con cargo a partida orzamentaria 11.A1.512B.610.1, código de proxecto 2018-00013, dos orzamentos da axencia de 2025.

3. Levar a cabo as actuacións de contratación, execución e dirección das obras descritas e formalizar os actos de recepción das mesmas.

4. Unha vez producido o acto formal de recepción comunicarao ao concello da Pobra do Caramiñal, entendéndose que tal comunicación determina o nacemento da obriga asumida polo concello na cláusula segunda, apartado 4, sen prexuízo das responsabilidades que correspondan ao contratista derivadas do contrato de obras. Posteriormente, e no prazo de dous meses, formalizarase a correspondente acta de entrega á entidade local.

### **CUARTA.- SEGUIMIENTO E CONTROL.**

Para o seguimento, control e avaliación de cantas dúbidas poidan xurdir na aplicación do convenio constituirase unha comisión de seguimento, coa participación dun representante da Axencia Galega de Infraestruturas e dun representante do Concello da Pobra do Caramiñal.

A comisión poderase reunir as veces que se estime oportunas para o cumprimento do convenio. En todo caso, a solución das incidencias que poidan xurdir estará condicionada polas limitacións orzamentarias incluídas na cláusula terceira.

As cuestións litixiosas xurdidas da interpretación, desenvolvemento e aplicación do convenio serán resoltas pola Axencia Galega de Infraestruturas, poñendo os seus acordos fin á vía administrativa. Contra estes acordos poderase interpoñer recurso contencioso-administrativo ante o Tribunal Superior de Xustiza de Galicia, de



conformidade co disposto na Lei 29/1998, do 13 de xullo, reguladora da xurisdición contencioso-administrativa.

#### **QUINTA. - NATUREZA DO CONVENIO.**

Este convenio ten natureza administrativa, rexéndose polas cláusulas que nel se establecen e, no seu defecto, pola Lei 40/2015, do 1 de outubro, de réxime xurídico do sector público e polo Decreto 246/92, do 30 de xullo, polo que se regulan as condicións de execución das obras públicas en réxime de cooperación coas corporacións locais, e outros entes de dereito público.

Na súa interpretación e desenvolvemento rexerá o ordenamento xurídico administrativo, con expresa submisión das partes á xurisdición contencioso-administrativa.

#### **SEXTA.-MODIFICACIÓNS DO CONVENIO**

As modificacións formalizaranse mediante *addenda* cos mesmos requisitos e condicións que para a aprobación do convenio, agás aquelas modificacións de carácter técnico aprobadas polo órgano de contratación, de acordo coa normativa de contratos administrativos, que non impliquen a superación do importe máximo reflectido na cláusula primeira do convenio.

Calquera outra modificación no contido deste convenio, requirirá acordo unánime entre o Concello da Pobra de Caramiñal e a Axencia Galega de Infraestruturas.

A Axencia Galega de Infraestruturas limitará en todo caso a súa achega económica ao pactado no presente convenio, polo que non asumirá os aumentos que se produzan por calquera causa, o que non implicará a subrogación desta en ningún dereito nin obriga que se derive da titularidade das obras, que corresponderá ao Concello da Pobra do Caramiñal.

#### **SÉTIMA.- RESOLUCIÓN**

Serán causas de extinción deste convenio a inviabilidade da realización das actuacións descritas por causas non imputables ás partes así como a renuncia por causas de interese público, a instancia de calquera das partes asinantes.

#### **OITAVA.- PUBLICIDADE.**

A sinatura deste convenio suporá o consentimento expreso das partes asinantes para incluír e facer públicos os datos persoais que consten no convenio, e mailo resto de especificacións contidas no mesmo, de conformidade co artigo 15 da Lei 1/2016, do 18 de xaneiro, de transparencia e bo goberno (DOG nº 30 do 15 de febreiro) e o Decreto 126/2006, do 20 de xullo polo que se regula o rexistro de convenios da Xunta de Galicia (DOG nº 149 do 3 de agosto).



### **NOVENA.- VIXENCIA DO CONVENIO.**

Este convenio terá vixencia dende a súa sinatura ata a entrega das obras no prazo sinalado na memoria redactada e, en todo caso, ata o 31 de decembro de 2025.

E para que así conste, en proba de conformidade coas cláusulas deste convenio, as partes asínano electronicamente.

A presidenta da Axencia Galega de Infraestruturas, María Martínez Allegue

O alcalde do Concello da Pobra do Caramiñal, José Carlos Vidal Suárez

